

## Powervrouw

Ik maek' heur wakker, een liefdevolle zaeke  
'Opstaon, schat. Carrière maeken!  
Jow broek hangt keurig streken an et knaopien, gien gefrommel  
Tomaten, brotien kese en een appel die he'k al in jow trommel  
Zi'j zegt: "De zonne schient, ik neem de Lamborghini  
Et wodt vandaeg' wat laeter, we drinken nog martini  
bi'j Giovanni, weej' wel? Jow zien mi'j wel weer kommen  
Ik moet d'r now vandeur. En daenk ie an de bloemen?"

Ik straol heur an en zegge: 'Maek je mar gien zorgen  
De bloemen en de ruten die doe 'k mittien vanmorgen  
Pas goed op jowzels! En ried veurzichtig heur!  
Mar ach zi'j is d'r al weer hoog en bried vandeur

Ze is een powervrouw, die alle trukies kent  
In Communication-Front-Consulting-Multi-Management  
is zi'j Main-Assistent-Chief-Controlling-Analist  
Ik hebbe nooit precies begrepen wat dat is  
Mar zi'j weet dat zi'j altied op mi'j rekenen kan  
Achter elke sterke vrouw staot een iev'rige man!

De bloemen bin verzorgd, de ruten bin lapt  
Et kletien in de kaemer liekt niet meer zo vertrapt  
Mit mien ni'je hietwaeterdaampschoonmaekopperaot  
het de drek gien schi'jn van kaans, is in een mum van tied vot  
De bosschoppen he'k daon en de bedden he'k verschoond  
ik hebbe stoft en zeugen, want dat bin ik zo gewoon  
Now waacht ik op heur en ik mis heur ommeraek  
Mar 'k weet da'k heur niet bellen mag bi'j heur op 'e zaeke

Ze is een powervrouw, die alle trukies kent  
In Communication-Front-Consulting-Multi-Management  
is zi'j Main-Assistent-Chief-Controlling-Analist  
Ik hebbe nooit precies begrepen wat dat is  
Mar zi'j weet dat zi'j altied op mi'j rekenen kan  
Achter elke sterke vrouw staot een iev'rige man!

Somstieden vuul ik mi'j zo muu en iensem zonder heur  
Mien therapeut zegt: 'Kop d'r weer veur!  
Een hobby veur jowzels dat is wat jow ontbrekt.'  
Mar bloemshikken of golfen, dat weet ik niet zo krekt  
Ik daenk dat zi'j wat het mit heur privé-secretaoris  
Zi'j lacht mar wat, en zegt dat dat toch absoluut niet waar is  
Mar die vent het spieren, daar kan ik niet tegen an  
en ik vertrouw heur niet, zi'j is ja ok mar een man

Zi'j is een powervrouw, want daar droomt zi'j van  
de wraak veur duzend jaoren onderdrokking deur de man  
Mar in et scheidingsrecht bin ik behoorlik thuus:  
as et zoveer is, dan hool ik et huus!

tekst en meziek:  
Jan Oosterhof